

Intervju: Pedi Ešdaun, visoki predstavnik u BiH: “Šta će visoki predstavnik raditi nakon isteka mandata”

Ešdaun: Bila bi mi velika čast lobirati za BiH

*Postavili smo temelje moderne decentralizirane države * Nakon oktobra naredne godine, OHR bi mogao prestati s radom * Borit ću se da se ukine vizni režim*

Za nekoliko sedmica međunarodna zajednica mogla bi donijeti odluku o tome ko će biti novi (i posljednji) visoki predstavnik.

Pedi Ešdaun trebao bi do februara naredne godine napustiti našu zemlju i vratiti se u London . Tamo se već sada renovira njegov dom. Iako u odgovoru na pitanje šta nakon mandata visokog predstavnika odmah kaže da će odmarati uživajući u baštovanstvu, priznaje i da ima drugih planova.

Put državnosti

Ešdaun kaže da je u svom prvom govoru krajem maja 2002. godine istakao tri prioriteta.

– Tada sam kazao da želim BiH nepovratno postaviti na put državnosti. Postavili smo temelje moderne decentralizirane države – obavještajna služba BiH je pod kontrolom parlamenta, imamo jedinstveni porezni sistem, jednu armiju pod kontrolom države, jednu carinu, SIPA-u, na putu smo da imamo jednu policiju, jedan ekonomski prostor...Sve su to neki od rezultata tri i po godine dugog rada – priča Ešdaun.

Međutim, naglašava da još mnogo toga treba uraditi kako bi stvorene institucije profunkcionirale i to će biti prioriteti njegovog nasljednika.

– Nepovratno smo, sada kada počnemo proces stabilizacije i pridruživanja s EU, zakoračili na put u Evropu. Do sada niko nije krenuo na taj put, a da na kraju nije postao član Evropske unije – kaže Ešdaun.

Kraj Ureda

Ističe i da mu je cilj bio da BiH bude što bliže trenutku kada joj OHR više neće trebati. Vjeruje da bi već nakon oktobra naredne godine OHR mogao prestati s radom , a zamijeniti ga Ured specijalnog predstavnika EU. Priznaje, ipak, da je postao emotivno jako vezan za BiH.

– To je prelijepa zemlja sa izuzetnim ljudima. Želio bih, ako mogu, lobirati za BiH. To bi mi bila velika čast. Želim nagovarati Evropu da požuri i uključi zapadni Balkan u svoju porodicu i da se to desi što je prije moguće. Ako budem u poziciji, nastojat ću da taj proces traje što kraće. Želim lobirati za ukidanje viznog režima. Neću sjediti skrštenih ruku, promovirat ću BiH svugdje gdje mogu – kaže Ešdaun.

Tri kandidata

– Međunarodna zajednica razmatra ko će biti moj nasljednik. Odluka o tome trebala bi biti donesena u četiri do šest sedmica. Već je u medijima bilo ko su dosadašnji kandidati – Čeh, Italijanka, te koliko znam i Holandija ima svog kandidata. Do sada Njemačka nije ponudila kandidata za visokog predstavnika – rekao je Ešdaun.